



Tillie Martinussen
Suleqatigiissitsisut sinnerlugit Inatsisartuni ilaasortaq

§ 37 apeqqut nr. 016-2020-mut akissut

01-02-2020
Sags nr. 2020 - 2057
Akt nr. 12926165

Asasara Tillie Martinussen

Postboks 1160
Tlf: 34 50 00
Fax: 34 55 05
3900 Nuuk

Inatsisartut suleriaasianni § 37 imm. 1 naapertorlugu apeqqutit tulliuuttut Naalakkersuisunut nassiuppatit. Apeqqutit uannit akineqartussanngorlugit innersuunneqarput.

Email: pn@nanog.gl
www.naalakkersuisut.gl

- 1. Nalinginnaasumik nuattoqarnerani nualluummillu tuniluuttoqassappat Coronavirus, 2019-nCoV, Wuameersoq tunnillaassuunnersoq misissorneqarsinnaanersoq Naalakkersuisut ilisimavaat?
-Taamaattoqarpat qinnuivigineqarpusi tamanna qanoq pisinnaanersoq nassuiaqqullugu.**

Pisariaqartitsineq aallaavigalugu Coronavirus (2019-nCoV) pillugu laboratoriami misissuisoqartitsisinnaavoq. Suliaq tamanna nunatta nakorsaaneqarfianit Dronning Ingridip Napparsimavissuata nakorsartinnermut immikkoortortaqaarfik suleqatigineratigut nakkutigineqarpoq, pisariaqassappallu immikkut ilisimasallit ilanngunneqarsinnaapput. Nappaammik suussusersineq Statens Serum Institut suleqatigalugu, timip kingornuttagai misissuisussatut, pissaaq.

Danskitt maannakkut ilitsersuutaat malillugu (31.1.2020) maannakkut pisoq inuit makkunikka ersiutillit kisimik coronavirus-eqarneranik pasineqassapput:

- Wuhan-imiissimaneq, Hubei-provinsimi ullut 14-nit iluanni ersiuteqalernermit. Imaluunniit
- Ullut kingullit 14-nit iluanni inuk tunillatsissimanermit pasineqarsimasoq imaluunniit tunillatsissimasoq 2019-nCoV-mik qanimut attavigisimappagu

Aamma

- Pinasuartumik, peruluttumik, kissarneqaatigaluni pualluttut¹

Nunatta Nakorsaaneqarfia peqqinnissaqarfimmut ilitsersuummik atugassamik nassiussinikuvoq, tassani erserpoq napparsimasoq tunillatsissimasoqarneranik pasinnittoqarpat imaluunniit tunillatsittoqarpat qanoq iliortoqassanersoq. Aammattaq peqqinnissaqarfimmi misissuinermit atortussat nassiussinissamut pisariaqartut aamma illersornissamut atortut qulakkeerneqareerput.

¹ <https://www.ssi.dk/aktuelt/sygdomsudbrud/coronavirus>

2. Naalackersuisut tamanna pillugu oqartussat kikkut suleqatigaat? Immaqa naalagaaffiit nunallu allat?

Naalackersuisut aamma Nunatsinni Nakorsaaneqarfik, pisumut susassaqartut suleqatigai soorlu assersuutigalugu Statens Serum Institut aamma Danmarkimi Sundhedsstyrelse siunnersuivoq coronavirus-imullu tunngatillugu ilitsersuutit nutarsartarlugit.

Nappaatit tunillaassortut akiorniarlugit iliuitsit pillugit Inatsisartut peqqussutaat nr. 20, 12. November 2001-imeersoq tunngavigalugu Naalackersuisut aalajangerput coronavirus (2019-nCoV) nappaatit uloriarnartut nalinginnaasut isigineqassasoq. Tamanna isumaqarpoq Tunillaassortunik nappaalanersuaqarneranut ataatsimititaliarsuaq oqartussaassuseqalerpoq coronavirus (2019-nCoV) pillugu akissuteqaateqarnissaminut. Tunillaassortunik nappaalanersuaqarneranut ataatsimiititaliarsuaq assersuutigalugu makkununga oqartussaalerpoq, nunatsinnut nunatsinniillu angalaneq pillugu malittarisassaliornissaq, imaluunniit pisariaqassappat tunillaassuinissamut navianaat annikillisarniarlugu iliuusissanik pilersaarusioneq.

Ataatsimiititaliarsuup ilaasortai ukuupput: politimesteri, nunatta nakorsaanera, nakorsat pisortaat aamma nunatta nakorsaataasiviani pisortaq, nersutit nakorsaasa pisortaat, akiliisitsiniartarfimmit aallartitaq kommuniniillu aallartitaq.

3. Kuppilersuummik pissarsinissap siuarsarnissaa viruseqartoqalerneranilu katsorsaasinnaaneq qulakkeerniarlugit Naalackersuisut nunarsuarmi suleqatit kikkut, suleqatigaat?

Naalackersuisut aamma Nunatsinni Nakorsaaneqarfik pisoq malinnaavigilluarpaat coronavirus-ilu pillugu nunat tamalaaniit pisut pillugit ilisimannilluni. Taassuma saniatigut takuuk apeqqummut 1 aamma 2-mut akissuteqaat

4. Innuttaasunut tunulliatseriaannaanerusunut inunnik tunillanneqarsimasunik sumiiffiit ilaanniittunik attaveqarsimasinnaasunut qaammarsaanissaq Naalackersuisut ilungersuutiginiarpaat?

Maannakuugallartoq coronavirus-imut tunillatsissimasut Kalaallit Nunaannukarnissaat ilimanaateqarpiangitsutut nalilerneqarpoq. Taamaattumillu Naalackersuisut aamma Nunatta Nakorsaaneqarfiani nittartagaaniittut eqqaassanngikkaanni, qaammarsaanissamut suliniuteqarnissaq pilersaaruteqanngikkallarpoq. Tunillaassortunik nappaalanersuaqarneranut ataatsimiititaliarsuup nalilerpagu allanik suliniuteqarnissamik pisariaqartitsisoqartoq, taava susassareqatigiit isumaqatigiissuteqarfigineratigut suliniutit pisariaqartut aallartisarneqassapput.

5. Naalackersuisut allanik suliamut soqutiginaatilinnik paasissutissiisinaanerlutik?

Maannakkuugallartoq coronavirus-imut akiuussutissaqanngikkallarpoq. Coronavirus-imik tunillatsittoqarsimaneranik pasilluteqartoqassappat peqqinnissaqarfiup Nunatta Nakorsaaneqarfiata ilitsersuussutaa aamma annertuumik pinasuartumillu anersaartornikkut nappaatilinnut tunngatillugu WHO'p nakorsartinnissamut ilitsersuut malinneqassaaq².

Inussiarnersumik inuulluaqqusillunga
Med venlig hilsen



Martha Abelsen

² [https://www.who.int/publications-detail/clinical-management-of-severe-acute-respiratory-infection-when-novel-coronavirus-\(ncov\)-infection-is-suspected](https://www.who.int/publications-detail/clinical-management-of-severe-acute-respiratory-infection-when-novel-coronavirus-(ncov)-infection-is-suspected)